

दिनांक 28.10.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- केंद्रीय मंत्रिमंडल 8 वें केंद्रीय वेतन आयोग बणायो-फॉस्फेट अर पोटाश खाद माथे 37 हजार 952 करोड़ रुपया री सब्सिडी री मंजूरी
- प्रदेश मांय वोटर लिस्टां रा विशेष गहन पुनरीक्षण सारू निर्वाचन विभाग काल सगळी सियासी पार्टियां रा नुमाइन्दां अर जिला कलेक्टरां रे सागे मीटिंग करेलां
- राज्य मानवाधिकार आयोग परिवहन विभाग ने बसां मांय हिफाजती मापदण्ड री पालना तैय करण रा हुकम दीनां
- राज्य मांय आज ई केई ठौड़ बिरखा रा समाचार -पारो 5 ऊँ 10 डिग्री सेल्सियस ताई उतर्यो

000

केंद्रीय मंत्रिमंडल 8वें केंद्रीय वेतन आयोग बणावण री मंजूरी दे दीनी हैं सूचना अर प्रसारण मंत्री अश्विनी वैष्णव आज नई दिल्ली मांय केन्द्रीय मंत्रिमंडल री मीटिंग पाछे खबरनवीसां ने आ जाणकारी दीनीं वे बतायो के आयोग 18 महीनां मांय सिफारिशां देवेलां मंत्री बतायो के आयोग मांय एक अध्यक्ष, एक अंशकालिक सदस्य अर एक सदस्य-सचिव व्हेलां

.....

मंत्रिमंडल ई सीजन री सिंयाळू साखां सारू फॉस्फेट अर पोटाश खाद माथे पोषक तत्व आधारित सब्सिडी री रेट ने ई मंजूरी दे दीनीं श्री वैष्णव बतायो के मंत्रिमंडल सिंयाळू साखां सारू करीब 37 हजार नौ सौ 52 करोड़ रुपया री सब्सिडी री मंजूरी दीनीं अ दरां एक अक्तूबर ऊँ लागू मानी जावेलां

.....

000

निर्वाचन आयोग प्रदेश मांय वोटर लिस्टां रा विशेष गहन पुनरीक्षण रो काम सरू कर दीनो हैं मुख्य निर्वाचन अधिकारी नवीन महाजन आज जयपुर मांय खबरनवीसां ने पुनरीक्षण रा काम री विगतवार जाणकारी दीनीं वे बतायो के ई बारा मांय काल सियासी पार्टियां रा नेतावां अर जिला कलेक्टरां सागे मीटिंग करी जावेलां श्री महाजन बतायो के 4 नवम्बर ऊँ चार दिसम्बर ताई गणना प्रपत्र बांटण अर भरी ज्या फॉर्म पाछा लेवण रो काम कर्यो जावेलां वे बतायो के ई सारू कर्मचारियां री सिखावण आज सरू व्हे गयीं श्री महाजन बतायो के विशेष पुनरीक्षण बाबत् स्कूल-कॉलेजां अर पंचायत लेवल माथे ऑनलाइन अर्जियां देवण सारू जाग जगावण रो अभियान चलायो जावेलां

.....

000

मुख्यमंत्री भजनलाल शर्मा आज कोलकाता मांय राखी ज्या प्रवासी राजस्थानी सम्मेलन मांय शामिल व्हां वे सामाजिक सेवा रा हलका मांय चोखो काम करण वाळा प्रवासी राजस्थानियां रो मान कीनो अर राजस्थान फाउंडेशन री कॉफी टेबल बुक रो विमोचन कीनो मुख्यमंत्री प्रवासी राजस्थानियां ने वां री जन्मभूमि री माटी री खुशबू ने देश-परदेश ताई पूगावण सारू धन्यवाद देता थकां 'पधारो म्हारे देश' कह र राजस्थान आवण रो न्यौतो दीनो वे कहयो के राज्य सरकार हर साल 10 दिसंबर ने जयपुर मांय 'प्रवासी राजस्थान दिवस' कार्यक्रम राखेला ताकि प्रवासी लोगां रो मायडू भूमि ऊँ लगाव बण्यो रह सकेलां मुख्यमंत्री कह्यो के राज्य सरकार हेरिटेज हवेलियां ने सैर-सपाटा री ठौड़ां री तौर ऊँ विकसित कर रही हैं श्री शर्मा कह्यो के राज्य सरकार रीको री नुवी प्रत्यक्ष भूमि आवंटन नीति रा तैत निवेशकां ने भांत-भांत रा सुबीता मुहैया करा रही है अर साल 2027 ताई किसानां ने दिन मांय ई पूरी बिजली मुहैया करावणो तैय करी ज्यो हैं

.....

000

उप मुख्यमंत्री दिया कुमारी आज स्वदेश दर्शन 2.0 रा तैत श्री खाटू श्याम जी कॉरिडोर रा विकास रा कामां रो जायजो लीनों मीटिंग मांय दिया कुमारी कह्यो के खाटू श्याम जी खास धार्मिक नगरी है अर जातरुआ ने बेहतर अनुभव देवण री राज्य सरकार री जिम्मेदारी हैं मीटिंग मांय आवण-जावण गैर-कानूनी कब्जा अर गाड़ियां ऊबी करण री ठौड़ ऊँ जुड़ी समस्यावां आगी करण सारु खास समिति बणायी ज्यीं

000

राज्य मानवाधिकार आयोग प्रदेश मांय बसां मांय लाय लागण रा वाकयां रो संज्ञान लेता थकां परिवहन विभाग ने बसां री हिफाजत ऊँ जुड़्या मापदण्ड री पालना तैय करावण रा हुकम दीना हैं आयोग लारला दिनां जैसलमेर मांय अर आज जयपुर-दिल्ली हाई-वे माथे बस मांय लाय लागण रा वाकयां ने गंभीर मान्यां आयोग आज मनोहरपुर कने बस मांय लाय लाग जावण रा वाकया री जयपुर रा ज़िला कलेक्टर अर परिवहन आयुक्त ऊँ रपट मांगी हैं ई बीचे, आज मनोहरपुर कने बस मांय लाय लागण रे कारण घणा जखमी व्ह्या पांच जणा रो जयपुर रा सवाईमानसिंह अस्पताल मांय ईलाज चाल रह्यो हैं जयपुर रा ज़िला कलेक्टर जितेन्द्र सोनी हादसा री ठौड़ रो दौरा कीनों वे खबरनवीसां ने बतायो के बस मांय उत्तरप्रदेश रा पीलीभीत ऊँ मजूर जयपुर आ रह्या हां वे बतायो के हादसा ऊँ जुड़ी जांच करी जा रही हैं

.....

ई बीचे जैसलमेर मांय लारला दिनां बस मांय लाय लाग जावण रे कारण मरण वाळां री तादाद बध र 28 व्हे ग्यी हैं ई हादसा मांय जखमी एक जणा री आज जयपुर रा सवाईमानसिंह अस्पताल मांय मौत व्हे ग्यीं दूजी कानी जोधपुर रा महात्मा गांधी अस्पताल मांय भर्ती दो जखमी लोगां री हालत जस की तस बण्योड़ी हैं

000

जालौर ज़िला मांय सांचौर कने भारतमाला नेशनल हाईवे माथे लाछड़ी टोल प्लाजा रे पास दो गाड़ियां री टक्कर रे कारण व्ह्या हादसा ऊँ एक ही पिरवार रा तीन जणा री मौत व्हे ग्यी अर दो जणा घणा जखमी व्हे ग्यां जखमी लोगां रो सांचौर रा अस्पताल मांय ईलाज चाल रह्यो हैं

000

सड़क परिवहन अर राजमार्ग मंत्री नितिन गडकरी कह्यो है के नेशनल हाई-वे बणावण सारु हाल ताई अस्सी लाख टन ऊँ बत्ती अपशिष्ट सामग्री काम लीरीजी हैं वे आज नई दिल्ली मांय **स्मार्ट सड़कों का भविष्य** मुद्दा माथे सी आई आई री ओर ऊँ राख्यी ज्या सम्मेलन मांय बोल रह्या हां श्री गडकरी कह्यो के इथेनॉल अर मेथेनॉल भेळ र ईंधन काम लेवण ऊँ माल लावण-ले-जावण अर आवण-जावण रा खर्च मांय पांच ऊँ छह फीसदी ताई कमी आयी हैं श्री गडकरी कह्यो के मजबूत बुनियादी ढांचो देश रा विकास री रीढ़ है अर साल 2027 ताई 5 ट्रिलियन डॉलर री माली व्यवस्था रो लक्ष्य हासिल करण सारु टिकाऊ सड़क विकास घणो खास व्हेलां

000

बंगाल की खाड़ी अर अरब सागर मांय व्हे रही हलचल रे कारण राज्य मांय आज ई बारिश व्हीं लारला 24 घंटां मांय बूंदी ज़िला रा नैनवा मांय सब ऊँ बत्ती 130 मिलीमीटर बारिश व्हीं आज अजमेर, उदयपुर अर कोटा संभाग समेत भीलवाड़ा अर जयपुर रा केई हलकां मांय हल्की ऊँ मझला दर्जा री बरसात रा आसार हैं लगातार बारिश रे कारण चित्तौड़गढ़ रा घोसुण्डा बंधा रा दो दरुजा खोल र बत्तो पाणी निकाळी ज्यो मौसम विभाग रे मुजब काल ऊँ बिरखा मांय कमी व्हेवण रा आसार है, हालांकि राज्य रा लंकाऊ हलका मांय हल्की बिरखा व्हे सके हैं बेमौसम बारिश ऊँ कट्योड़ी साखां ने घणो नुकसान व्ह्यो है अर पारो 5 ऊँ 10 डिग्री सेल्सियस ताई उतर्यो हैं

000

डीग ज़िला मांय किसानां रो रुझान जैविक खाद ओड़ी बध रह्यो हैं संयुक्त निदेशक कृषि, रामकुमार जाट बतायो के **'गोवर्धन जैविक योजना'** रा तैत सरकार किसानां ने वर्मी कंपोस्ट इकाई लगावण सारु 10 हजार रुप्या री सब्सिडी दे रही हैं ई रो फायदो लेवण सारु ज़िला रा 1 हजार 3 सौ ऊँ बत्ता

किसान अर्जी दीनी है ज्या मांय ऊँ 870 किसानां ने प्रशासनिक मंजूरी मिल गयी हैं म्हाणी खबरनवीस बतायो के जैविक खाद ऊँ मिट्टी उपजाऊ बणी रहेवेलां

000

बारां ज़िला रा अंता विधानसभा हलका मांय उपचुणाव सारु 11 नवंबर ने पड़बा वाळ वोटां बाबत् पोलिंग पार्टियां रा करीब साढ़े सात सौ पीठासीन अर प्रथम मतदान अधिकारियां ने आज दूजा दौर री सिखावण दीरीजीं पर्यवेक्षक सुभाश्री नंदा सिखावण रो काम देख र ज़रूरी हुकम दीनां ई बीचे अंता उपचुणाव सारु चुणावी हलचल ई निजर आवण लागी हैं उपचुणाव सारु 15 उम्मीदवारां बीचे मुकाबलो व्हेलां

000